

愛如生數字古籍

 愛如生
www.er07.com

序

余於壬申之春解涪益縣篆捧檄來守斯土值邑名宿繆澣澄君方纂修縣志及晉謁知書將成而絀於貲勢難急就省縣間種種徵求又從而旁撓之責效者遲之幸繆君性恬靜舍著述外無所事事盡其在我爲輪爲彈不置辯也余迺取其已編之稿而觀之知其體大思精包羅宏富微苦心孤詣不及此迺喟然歎曰無惑乎非欲速可得也蓋九仞之功關係一簣對上對下我與有責不浹旬而稿告脫例由縣政府呈轉核定奉 省府令以繆君學識優長殫精竭慮書爲滇中傑構不可多得飭即籌款付印夫考獻徵文守土者責余甫到任而此邦掌故即得樂觀厥成何其幸也况上峯有命事屬文化敢不盡心力而爲之惟是欸項支絀曩建設局長李雄才幾經商榷未克如願籌思至再始由該局橋樑涵洞餘款項下設法指撥詢謀僉同但爲數仍僅銀貳千元嫌其不敷再由該局發售預約券以附益之得銀又約千元於是此書遂得告付印出版繆君謂余曰此公之功也余應之曰百年典故賴子而傳吾責容或有

未盡得附簡末幸矣何敢以爲己力繆君曰清代末葉經五修州志而四未發刻蓋成
功若斯之難也余頷之是編也用力久而取材富考証精纂述密文化結晶也余雖乏
史地常識而知其有裨政俗不淺特識數語於此爲邦人諸友介紹且以見書之待其
人而後作及非其時或不能遽成者此其中殆有定數與所謂夙緣者非耶民國二十
三年雙十節宣威縣縣長筠連陳其棟謹序

總序

國家奠都金陵百度維新十七年本省政府第二十期公報載有行政院令飭全國纂修方志原文並聲明登報代令飭即遵照等因於時長吾縣者爲閩侯王公貽齋長教育局者爲及門縣人李君雄才官紳合商以爲縣志失修近百年再因循文獻益無可攷陸軍少將縣人侯靖臣君時以勦匪在籍聞而善之曰志局果開開辦費由余代籌遂乃勘定局址於教局東偏就原有房舍而修繕之先是民一十第四屆省議會初選當選宣人麴集曲靖及門陳曉鼇君以赴國會召集之便與偕至曲訪余於省立第三師校語及宣中文獻謂余宜負總纂之責鄉人在座者僉以余前在清季曾奉編宣威鄉土志提學使署實代印行駕輕就熟責無旁貸旋由陳君籌交相當之款曰聊樹之礎請保管徐謀建築嗣是而鄉人之屬望者愈衆余方頻年饑驅未能爲桑梓效也是歲寒假在籍雄才頻頻促我且曰吾邑舊幸有志叙述至道光末因其原文而加入咸同以後數十年事斷代至鼎革之間需時當不甚多以意揆之暮可已矣余曰如子言

則續前清宣威州志耳觀政府之所主張固當有民國宣威縣志之出現也續前清州志至戊戌政變之間事項已較繁雜纂民國縣志至北伐成功而後局勢尤爲鼎新以舊志類目包容之隘矣且舊志不無待勘之點新書則少草創之基官文書及私家載記苟足供吾人之攷證而田夫野老能談咸同以來故事者又所在而有把管其間曷勝愉快乃滄桑屢變人民迭更不特遠者無傳信之資即近在十餘年間亦少徵實之望欲備國史要刪憂憂乎難任其事而不忠於其職致潦草以塞責吾不忍爲也子何言之易耶雄才曰唯唯若先生言但願勉爲其難爲吾邑光縣長王黽公以余將返曲校言之尤切且以暑假期中迫望開局爲訂既至曲課餘有暇參酌新舊羣書擬定例目及調查事項各表郵寄到宣雄才准此而部署之比余如約歸來局務已略就緒刊物亦經告成即函縣府令發各區保填造別派訪員四出指導而督促之時黽公業經卸事繼任者爲陳公淳初陳雖武人而志局始基實深賴其維持所自愧者無作史之三長而謬膺重寄性既魯鈍意復求詳舊有新增搜剔不已致終淳公之任而書未

及告成共事諸人以時間之延長人事隨之而多變也各務脫離別謀生計余於此欲罷不能欲進不可爲擢節開支計商之縣府移局到家以便從容將事自二十年一月起至翌歲十月止裘葛又經再易而書之大體於茲始告完成責言之來所難避也而筆路濫褻草莽間之生活亦云憊矣竊有所聲明者志之爲義本以寫實存真爲唯一任務後世雖有作家超軼前後要不能不根據舊籍窮究事實以求進化原理故學說有變文章有變時局有變而歷來政俗載在冊籍者其文終不可變噩噩苗疆安司世守故實難變也雖其後土變爲流州變爲縣專制變共和階級變平等而言及元明典故不能不謂彼爲始居此地之爽鳩至於文化崇庠則各有時代關係不能執一以概其全是故民國以前忠臣孝子義夫烈婦名宦鄉賢下逮一切軼聞瑣事在方志中各有相當價值代表當時風俗習尚後之人執筆編纂能盡從刪節而謂其無當潮流耶抑可改變事實求合於今日之崇尚也或者徒見報章載有某省某縣毀節孝祠坊等舉動以是而疑志書收入此類人物不適於今日社會轉瞬書當作廢等語不知政

府對於婦女之解放神權之推倒均意在維新以後並非追貶從前且重在破除迷信而非否認曩哲瑰意琦行文化上之歷程新者多出於舊而舊每不如新善能演進故也至有時新之太過則或反不如舊故鑑古觀今貴有典要孫中山爲革命元祖而於禮教多所維持歐美學者則掘發地層以求過去之種種泥鴻片影編者何容心乎索隱探賾拾遺收殘徵實刊誤史地家必由之道無古今中外一也本書之收功也在今縣長筠連陳公立生任內公本文人故尤重視文獻凡經費之籌畫文報之要請積年累月在事者均不能沒其功而九仞之山勿虧一簣則陳公實克有終雄才不與縣政久矣既而主任建局於志務亦渺不相涉矣以其未殺青也鞅掌趨蹌卒與余始終其事此尤足感念者也顧稿雖定欸雖集而付印事體在滇中爲尤難賴惠雲岑君以原任官印局長經驗灼知其中委折又多識印界人物對於是書則謬許爲不朽傑構不能聽任湮沒也近則接洽印館遠則函商官紳拮据日久而本書始全告完成今而後的樹矢集千斯瘡而百斯孔不能爲吾書諱矣亦容有察其孤誼諒其苦心提携而呵

護之焉所難料也知我罪我一聽自然顧使我完其功罪之場智爲殫而力爲痛者前
塵且在詎能忘於余懷耶是書也搜羅雖未必富攷證雖未必確筆削雖未必當而拋
磚引玉種藍收青後有作者再從而要刪之使定本於以出現此則余與在事同人所
共禱祝也夫是爲稿

民國二十三年十月一日邑人繆果章澣澄甫自序

宣威縣志稿

凡例

一本書爲民國宣威縣志所志故實當然詳於民國而略於已往其有關係重要事體認爲必須詳載者則絕無今昔之分

一本書原兼有斷代爲志與通志以往兩重義務其可畫分今昔者畫而出之以清眉目否則不強割裂

一本書將次告成始奉到省頒縣志綱目草案查其歸類及編纂方法與本書不無出入本書當然改從草案以歸一律而免立異惟其間頗具鑑錘一髮之動牽及全書時間上亦不許可是以祇求實質合於省中規定與縣中所有者爲斷不求面貌之全合

一本書計分八綱曰大事記曰輿地曰職官曰政治曰民族曰人物曰藝文曰雜載各大綱中分隸子目多寡無定

一大事記及政略等篇於現代元勳偉人均直書姓名無所規避以前清事例揆之未免有不敬之嫌不知避其名於一時將不能傳其人於後世書中對於舊志此類經

查悉者一律更正

正傳外不拘此例

一凡百事件均有主安人物爲功過之所歸若並在事人員一體記載則責任不清而事實無當矣閱者幸諒及此

一舊志所載明清事跡以時地上關係進退或至失實如永曆未走黔國猶在清兵遠在數千里外而即大書世祖年號若早歸其統治者然清人執筆不得不爾若遂沿之是直抹熬明遺抗志排滿圖存一隅之壯志矣悉爲更正以昭核實

一宣之爲州雖承諸益之舊而實以屯所地面及其民衆爲基本諸所統原僅土州彝民而屯軍之籍則皆中州大姓土州民衆地廣大荒而不治故夷糧之輸入有限軍籍華族披草萊蒙荊棘化饒瘠而爲沃壤國家之止供賴之其人說禮敦詩尤風俗所恃以變易惟因滇黔異轄各私其土故於治城所在在貴州都指揮使司則以爲

烏撒衛後所城在雲南布政使司則以爲霑益州城溯源返本城實爲所而築而霑特僑治也徒以所既併入州當然以州爲主舊志詳此略彼未爲不當編者以其關係之重遂爲搜輯顧當抱殘守闕之餘所知亦有限也

一明清以前荒遠難攷立圖自洪武年間始清以後分境分區其事皆關重要而區域之沿革尤繁並製爲圖以資參考

一有宣以來民族分佈狀況於治亂上關係亦重圖凡四幅用覘大略

一建置沿革與舊志略有異同因舊志詳於霑益而略於後所其分合原委概未聲明故特更正

一面積非用鳥里計算不能適合特參照續通志及陸軍測量局繪製圖案量爲伸縮一屬於天文事項東西講學家有併入地文中者編者對於天文素乏研究抄掇撫拾未必得當援例編入輿地欄中以便藏拙

一境內分區狀況以關於自治者爲最重要因編纂本欄之時此項事體尙未著手故

特根據團保叙錄市村區總其綱保列其目而各村寨則又爲目中之日期於有條不紊蓋本境團區組織原有系統名稱上質量上略加變易便合於區鄉鎮閭鄰之規定但當修改未定之際不能強爲斷制耳

一山脈水系中遇有名勝之跡與先哲冢墓皆即附帶著明以後亦不再闢斯欄

一邊境數大水及流經腹地之盤龍河源委脈絡言者每多歧異詳加調查期足訂正

一湖泊大者應繪具圖說爲興利除害張本因尙無精密之測勘暫存其大概

一古蹟一項在今日則如廢署廢廟皆其選也其或改作他用亦必爲具始末以告於後

一物產分動植鑄三部均祇詳其天然狀況與其效用不用科學分類法不暇詳系統也不涉及人工製造有農工等欄在也

一官制查照元明兩史前清會典一統志雲南通志諸書於舊志所闕而應行補載者補之或失之過略而應行加詳者詳之又如烏撒衛務所舊志以爲鎮撫司二百戶

所十則其爲千戶所一也無疑義矣而乃曰千戶所八夫千戶所既得其八則鎮撫司當有十六百戶所當有八十而何以僅曰二曰十乎其錯誤之點當因認後三所之三爲以數量言但後三所果爲三千戶所則合正副千戶計算當共爲九而不止於八矣正副千戶三始成爲一千戶所而一千戶所實統鎮撫司二百戶所十此乃一代定制且宣化一里屯賦有限謂爲十百戶所所經營殆無不合觀於此則知舊志於屯所方面不甚注意而後三所之三以次第言非以數量言從可知矣

一職官表對於省委諸公項格書寫其諸將在外以便宜委令暫代者照低一格尊主權亦以明事變也其與省府立於對敵地位侵我主權剪我邊陲者所委亦難從闕闕則政系中斷變例旁注正任之下以資考証

一政略分叙文武文官概由他省他縣蒞治是邦除現任者例宜規避縱有特長編載宜緩外其已經去任之官則雖晚節不終鄉居有玷而當年設施果於吾邑有利則自不憚原本事實昭示於人武職則本籍人與外籍人均有握重兵戡禍亂造福是

邦者一律紀載則違反生人不能立傳之旨全盤刪削又殊矢地方啣感殊勳之忱
本書特採文官之例以待武官之非本籍人而業經他往者對於產自本籍之武官
則仍守生人不能立傳之例留俟他日但其表表殊勳則亦於大事記中因事以著
一民國以前文武職官政略已載舊志者照舊登錄外餘並以在宣實施爲定不追
既往不逆將來其於本籍人之在本籍得握將印著戰功者仍收入人物志之武功
欄爲桑梓光

一國府分部省府分廳縣府則以三科四局分承各部廳飭辦事件機關減而職責之
歸併應有盡有故不必依照部廳區分類目而就四局所掌已足吸收政治之全
一歷代制度文爲依類歸納如叙公安則自涉及團保述團保則自牽連兵防而凡公
安局職掌或爲歷史相承之端或係眼前創辦苟於前代故實有同一之作用者自
不妨因此及彼各存真相以見沿革之有本以覘改進之得宜
一財政舊苦紊亂近雖設局整頓而因需欸之途甚多收入之量有限門攤戶逗在人

民則苦累難支攘臂脫巾在悍卒則嘩噪不已致其現相成爲撥欸機關無所謂收亦無所謂支吁狼狽甚矣照例分國家地方兩項收支而各書其本末及沿革概況其出於臨時發生如公債糧秣募兵等項不由財局負責而對於人民財政關係彌切者附於篇末焉

一教育分期叙述以民一六後施行黨化爲一期屬於現代一六以前至清廷變法之際新舊雜陳要其歸皆以尊經爲極是謂近代教育立孔孟爲模範以宗教式之祀典崇奉之非其書不讀非其禮不行設書院以課其俊秀置教官以董其不率放學差主考以時進退其人士使皆循循於禮法是謂古代教育

一建設分農工商鑛漁獵交通六門各就其原有狀況調查編製希冀當局之改進
一司法與行政兩院對峙現因共和初步人民知識未開地方中各種組織亦未完備
省府知時勢之有待仍以行政官兼握法權然而一切設施凡皆爲獨立預備述其事於行政之後以清兩權疆界

一南京奠後中央國民黨總部派員至省成立省黨部旋由省黨部派員至宣成立縣黨部所賦使命及應有工作能否次第完成觀風問俗者特別注意而通志館之徵求又以此條爲先序錄於茲者官治之終民治之始也

一自治爲行使四權之基質言之則立法院之產地也是爲政權所在吾民能否自治出握政權不能不攷究原有民族種類及其言文禮俗習慣與所出之人物應如何保其美而去其惡始有合於進化之旨而爲立法精神之所許可故下文遂脫離政治分叙民族及人物

一屯所人民披荊斬棘闢茲寸壤州縣之所由設也賴此其後張公漢蒞治新州招領土司山場原野土舍人及營日等亦各變賣其私庄而軍籍子孫及新自外來華族遂散布六里之內山巔水湄墾種殆遍造成今日之宣威至於各區土著濡染華風說禮敦詩馳逐文場亦所在而有且其先祖被苦蓋驅豺狼草昧之開不失爲大輅椎輪除有祠堂譜系堪資紀載者外其姓氏均不可以不詳也